

आकाशवाणी जयपुर-अजमेर
प्रादेशिक समाचार

दिनांक 07.06.2025

समय: 18.45 बजे

- व प्रधानमंत्री नरेंद्र मोदी एनडीए सरकार रा 11 बरस पूरा होबा माथे **किसान कल्याण** खातर सरकार री प्रतिबद्धता दोहराई।
- व प्रदेश मांय वंदे गंगा जल संरक्षण जनअभियान रे तैत जल संरक्षण रा केई कार्यक्रम राख्या गया।
- व ईद-उल-अज़हा देश भर मांय धार्मिक उच्छाव अर उल्लास रे सागे मनायो जा रह्यो है।
- व राज्य रा केई हलकां मांय तापमान मांय बढ़ोतरी-काल सूं बीकानेर संभाग अर शेखावाटी हलका मांय कठे-कठे लू चाल सके है।

000

प्रधानमंत्री नरेन्द्र मोदी देश रा काश्तकारां रा कल्याण खातर सरकार री प्रतिबद्धता दोहराई। एनडीए सरकार रा केन्द्र मांय ग्यारह बरस पूरा होबा रे मौके श्री मोदी कह्या के या सरकार खातर गौरव री बात है। के उण रा इण कार्यकाल मांय देश रा मेहनती कातकारां री सेवा करी गयी। श्री मोदी लारला ग्यारह बरस मांय किसानां रा विकास खातर करी गयी कोशिशां रा बारा मांय बताया। जिण सूं खेतीबाड़ी रा हलका मांय बढ़ो फेर बदल व्ह्यो। श्री मोदी कह्या के काश्तकारां रा कल्याण खातर सरकार री कोशिशां आवता टेम मांय भी जोर-शोर ऊं जारी रहवेला।

000

देश मांय सेवा, सुशासन अर गरीब कल्याण रा सिद्धांतां सूं प्रेरित व्हे र एक दशक मांय महत्त्व जोग बदलाव व्ह्यो है। लारला 11 बरसा मांय, भारत कृषि हलका मांय घणी तरक्की करी है। इण दौरान कृषि मांय सरकार रो बजट आवंटन करीब पांच गुना बढ़यो है। बरस 2013-14 मांय यो 28 हजार करोड़ रुपयां हो जो बरस 2024-25 मांय एक लाख 37 हजार करोड़ रुपया व्हे ग्यो। प्रधानमंत्री किसान योजना रे तैत तीन लाख 70 हजार करोड़ रुपया सूं बत्ती री धनराशि 11 करोड़ काश्तकारां ताई सीधी पूगी है। काश्तकारां री माली सुरक्षा मांय भी सुधार व्ह्यो है। इण बरसा मांय गेहूं, धान, दलहन अर तिलहन भांत री खास फसलां रा कम ऊं कम समर्थन मूल्य मांय भारी बढ़ोतरी व्ही है। सोलर पंपां खातर पीएम-कुसुम अर प्राकृतिक खेती मिशन जेडी योजनावां सूं कृषि हलका मांय मजबूती अर स्थिरता ने बढ़ावो मिल्यो है। दूध उत्पादन मांय 63.... सूं बत्ती री बधवार व्ही है जिण सूं भारत दुनिया रो शीर्ष डेयरी उत्पादक देश बण ग्यो है। प्रदेश मांय भी काश्तकारां ने एनडीए सरकार री किसान कल्याणकारी योजनावां रो भरपूर फायदो मिल्यो है।

000

कृषि मंत्रालय अर कृषि अनुसंधान परिषद नई दिल्ली री कानी ऊं चलाया जा रह्या कृषि संकल्प अभियान रे तैत जैसलमेर मांय किसान-वैज्ञानिक संवाद कार्यक्रम राख्यो गयो। अभियान रे तैत ज़िला रा भणियाणां, दांतल, पन्नासर, भोखोडाई, रातडिया अर सांकरिया गांवां मांय कार्यक्रम राख्या गया। इण कार्यक्रम रे जरिये काश्तकारां ने खेती री नुवी तकनीका री जाणकारी दे र कृषि मांय नवाचार ने बढ़ावा री कोशिश करी जा रही है।

000

प्रदेश मांय चाल रह्या वंदे गंगा जल संरक्षण जनअभियान रे तैत पाणी बचावा रा केई काम कर्या जा रह्या है। आज बालोतरा ज़िला रा समदड़ी पंचायत समिति री लालाना ग्राम पंचायत रा मांगला मांय ताळाब मांय श्रमदान कर्यो गया। इण मौके लोग तालाब सूं मिट्टी काड़ी अर पौधा लगाया। वठिने झुंझुनूं मांय अभियान रे तैत श्री गोपाल गौशाला मांय वर्षा जल संरक्षण खातर बणाया गया दो स्ट्रक्चरां रो लोकार्पण पैली रा केंद्रीय मंत्री कैलाश चौधरी कर्या। वठिने बाड़मेर ज़िला मांय भी अभियान रे तैत केई गौशालावां मांय स्वच्छता अभियान चलायो गयो। बालोतरा री रिछोली ग्राम पंचायत रा रेतीला धोरां मांय महकमो एक बगीचो तैयार कर्यो है। रेतीला धोरा रे बीच बण्या इण बगीचा मांय आंवला, शीशम, बेर, अनार अर नीबू रा पौधा तैयार कर्या गया है। लारला तीन बरसा री

कडी मेहनत रे पाछे ओ बगीचो सगळा ने सुकुन दे रह्यो है। जल ग्रहण विकास महकमां रा अधीक्षण अभियंता बताया के वन्दे गंगा जल संरक्षण जन-अभियान रे तैत 37 लाख रिप्यां री लागत सूं बण्या इण बगीचा मांय ड्रिप सिस्टम रे जरिये सिंचाई व्हे री है।

000

देश मांय आज ईद-उल-अजहा धार्मिक आस्था अर उच्छाव रे सागे मनायो जा रह्यो है। लोग आज सुंवारे ईदगाहां अर मस्जिदां मांय ईद री नमाज़ अदा करी अर एक-दूजा ने बधाई दी। मुस्लिम बाहुल्य इलाकां मांय ईद-उल-अजहा माथे खासो उच्छाव हो। इण बीच प्रशासन बकरा ईद माथे दी जाबा वाळी कुर्बानी बाबत् लोगां सूं अरज करी के वे खुला मांय कुर्बानी नी करे अर इण रा वीडियो भी वायरल करबा सूं बचे। जयपुर मांय आज ईद री खास नमाज़ ईदगाह मांय अदा करी गई। सवाईमाधोपुर अर झालावाड़ मांय भी ईद माथे खास नवाज़ अदा की गई है। इण मौके लोग एक-दूजा ने मुबारकबाद दी।

000

लोकसभा अध्यक्ष ओम बिरला कह्या के भारत कानून रा शासन, वैश्विक इमदाद अर विश्व मंच माथे बातचीत री जरूरत रो हमेशा समर्थन कर्यो है। ब्राजील रा ब्रासिलिया मांय ब्रिक्स संसदीय मंच री बैठक रे पछे श्री बिरला बताया के ब्रिक्स देशां रे बीच संसदीय इमदाद मजबूत करबा री साझा प्रतिबद्धता दोहरायी है। वे कह्या है के ब्रिक्स देश पहलगाम मांय व्ह्या आतंकी हमला माथे विरोध जतायो हो।

श्री बिरला बताया के आवतो ब्रिक्स शिखर सम्मेलन भारत मांय व्हेला।

000

आर.ए.एस. 2024 रा अभ्यर्थियां रो जयपुर मांय राजस्थान विश्विद्यालय रे बारे लारला तीन दिन ऊं धरणो जारी है। काल सूं कुछेक अभ्यर्थी अनशन भी सुरू कर दीनो। ये अभ्यर्थी मुख्य परीक्षा री तारीख ने आगे बढ़ाबा अर सालाना परीक्षा कैलेंडर री मांग ने ले र आंदोलन कर रह्या है। आप री मांगां बाबत् अ अभ्यर्थी विधायकां, सांसदां अर राज्य सरकार रा मंत्रियां सूं भी मुलाकात कर रह्या है। आर.ए.एस. अभ्यर्थी दशरथ शर्मा आकाशवाणी ने बताया के आर.ए.एस. 2023 रो नतीजो जारी नी व्ह्यो है। इण मांय आर.ए.एस. 2024 री मुख्य परीक्षा कराणो न्यायसंगत नी है।

000

अंतर्राष्ट्रीय योग दिवस रे मौके आकाशवाणी जयपुर रा क्षेत्रीय समाचार एकांश री कानी ऊं संदेश श्रृंखला चलाई जा रही है। जिण मांय आज सुणो योग विशेषज्ञ डॉ. दिलीप सारण रो संदेश।

000

प्रदेश मांय पश्चिमी विक्षोभ रो असर खतम होबा रे पछे अबे तापमान मांय फेरु बढोतरी व्हे री है। हनुमानगढ़ मांय आज सुंवारे तेज गर्मी अर लू रो असर जनजीवन माथे पड़यो है। वठिने सवाईमाधोपुर मांय भी तेज गर्मी सूं दिन मांय बाजार सूना निजर आया। तेज गर्मी रे चालता पक्षियां ने राहत देबा खातर केई सामाजिक संगठन जुट्योड़ा है। भरतपुर रा सार्वजनिक पार्क मांय पक्षियां खातर परिण्डां अर रेबा री व्यवस्था करी गयी है। मौसम महकमां रे मुजब आवता सप्ताह मांय बत्ती ठौड़ां माथे मौसम सुखो रहवेला। आवता दो-तीन दिनां मांय बत्ती ठौड़ां माथे तापमान मांय 2 सूं 4 डिग्री सेल्सियस री बढोतरी वे सके है। मौसम केन्द्र जयपुर रे मुजब काल सूं आवता तीन दिन बीकानेर संभाग अर शेखावाटी हलका मांय कठे-कठे गर्म हवावां चाल सके है। बीकानेर संभाग अर आरे-सारे रा हलकां मांय धूलभरी आंधी चालबा रा आसार है।

000